



Incassament da las contribuziuns per la "Finanziaziun speziala cumbat cunter epidemias d'animals» e per il fond puril per promover la vendita da muvel per l'onn 2026

Tenor la "Lescha davart ils fatgs veterinars (DG 914.000)" vegnan incassadas contribuziuns annualas per la "Finanziaziun speziala cumbat cunter epidemias d'animals".

1. Contribuziuns ordinarias

Las contribuziuns per animals da la spezia da las nursas, da las chauras, dals arments e dals chavals vegnan calculadas il 1. da schaner sin basa da la media dal dumber d'animals ch'èn registrads en la banca da datas davart il traffic d'animals (BDTA) da l'onn precedent. Las contribuziuns ston er vegnir pajadas, sch'il manaschi è vegnì serrà u vendì suenter il 31.12.2025. Las contribuziuns èn er da pajar, sch'ils animals èn stads mo in curt temp sin il manaschi.

Las contribuziuns per animals da la spezia dals portgs, dals chamelids e dals avieuls vegnan calculadas tenor las cifras d'animals da la «enquista da las datas da structura» da l'uffizi d'agricultura e da geoinformaziun dal 1.1. Tar ils avieuls vegnan resguardads ils pievels envernads.

L'Uffizi per la segirezza da victualias e per la sanadad d'animals metta a quint a las vischnancas l'atun 2026 las contribuziuns (tenor l'art. 37 da la lescha davart ils fatgs veterinars; DG 914.000). Sco basa vala da nov il princip dal lieu da domicil.

Tenor il conclus da la regenza nr. 857 dals 7 da november 2023 importan las contribuziuns da las possessuras e dals possessurs d'animals a la "Finanziaziun speziala cumbat cunter epidemias d'animals"

- 6.00 francs per mintga animal da la spezia dals arments
- 3.00 francs per mintga animal da la spezia da las nursas
- 2.00 francs per mintga animal da la spezia da las chauras
- 1.50 francs per mintga animal da la spezia dals chavals, dals portgs e dals chamelids
- 5.00 francs per mintga pievel d'avieuls

2. Program da cumbat cunter la palusa bletscha

La palusa bletscha (malsogna da las unglas da las nursas) è tenor las disposiziuns da l'art. 4 lit. d ed art. 229 ss. dalla "Ordinaziun davart epidemias d'animals (OFE; CS 916.401)" in'epidemia d'animals che sto vegnir cumbattida cun in program naziunal durant 5 onns.

Tenor l'art 229b OFE vegn incassada ina taxa annuala supplementara da las possessuras e dals possessurs da nursas per cuvri ina part da las analisas da labor. Ella importa 30 francs per prova collectiva da fin 10 animals, dentant maximalmain 90 francs per muntanera da nursas. Calculada vegn la taxa tenor la media da l'effectiv da nursas da l'onn precedent a maun da las datas da la banca da datas davart il traffic d'animals (BDTA).

3. Animals alpegiads che derivan d'ordaifer il chantun

Tenor il conclus da la regenza nr. 857 dals 7 da november 2023 importan las contribuziuns per animals alpegiads che derivan d'ordaifer il chantun

- 7.50 francs per mintga animal da la spezia dals arments

- 1.50 francs per mintga animal da la spezia dals chavals, dals portgs, da las chauras, da las nursas e dals chamelids

Las contribuziuns vegnan messas a quint a las vischnancas che han ad alp sin lur territori animals che derivan d'ordaifer il chantun, quai ensemen cun las contribuziuns ordinarias. Il dumber d'animals alpegiads extrachantunals, per ils quals igl è da pagar contribuziuns, vegn erui dal USVA or da las datas da la BDTA. Las contribuziuns ston vegnir pajadas er per animals ch'èn vegnids stgargiads pli baud u ch'èn crappads durant la stad. Sco data da referenza vala ils 25 da fanadur. Plinavant renviain nus a l'Ordinaziun d'alpegiada (DG 914.200) ed a la disposiziun generala da l'uffizi per l'alpegiada 2026 en il chantun Grischun.

4. Fond puril muvel

Las contribuziuns a favur dal Fond puril per promover la vendita da muvel importan per l'onn 2026 2.75 francs per mintga animal da la spezia dals arments. Questas contribuziuns vegnan incassadas tar las vischnancas per incumbensa da l'Uniun purila grischuna ed ensemen cun las contribuziuns per la "Finanziaziun speziala cumbat cunter epidemias d'animals».